

四庫全書

史部

欽定四庫全書

史部

欽定南巡盛典卷二十五

詳校官廣西道臣王天祿

欽定四庫全書

欽定南巡盛典卷十五

恩綸

臣等謹案書曰大哉王言記曰王言如絲其出如綸王言如綸其出如縟古帝王發號施令必有大澤以副之而尚書載堯以來典謨誓誥之文綦備作於巡狩時者未之見焉周則陳詩有命納賈有命文雖闕如制昉諸此兩漢分制詔令勅為四品

文章爾雅訓詞深厚然如永平之幸滎陽建初之
行秋稼劇易親知貧弱有利外此亦不多觀豈史
文闕略抑所謂淪浹者有未備歟我

皇上廣運聖神亭育函夏恢纘

前光

六巡江浙介

慈寧之福慰望

幸之忱自辛未以迄甲辰繼繩

祖武奉若

成憲兢兢以簡儀衛除供億崇樸黜華擗節愛養為本而
自疆吏以逮編氓無不仰沐

仁膏同歸揚詡

加恩於無可復加

利物而不言所利中外禔福含仁謳風夫豈漢唐以來
所能比擬乎竊嘗玩有孚惠心勿問元吉之占解
者多云加惠于民不問可知為元吉伏讀

聖製釋為加惠而不問其感與弗感是則

至德如天默運於

辰居端拱者既極其周詳而普被於

鑾輅經臨者益昭夫優渥河濟以北江淮以南歌衢祝
華之聲怡怡于于仰

帝車而未有艾者其感戴更當何如也謹錄

恩綸第二

欽定四庫全書

欽定南巡盛典卷二十五

恩綸

乾隆十四年十月初五日

上諭內閣曰江南督撫等以該省紳耆士庶望幸心殷
合詞奏請南巡朕以鉅典攸闕特命廷臣集議今經
大學士九卿等援據經史且仰稽

聖祖仁皇帝六巡江浙謨烈光昭允宜俯從所請朕軫念

民依省方問俗郊圻近省不憚躬勤鑾輅江左地廣
人稠素所厘念其官方戎政河務海防與凡閭閻疾
苦無非事者第程途稍遠十餘年來未遑舉行屢嘗
敬讀

聖祖實錄備載前後南巡恭侍

皇太后鑾輿羣黎扶老攜幼夾道歡迎交頌

天家孝德心甚慕焉朕巡幸所至悉奉

聖母皇太后遊賞江南名勝甲于天下誠親掖

安輿眺覽山川之佳秀民物之豐美良足以娛暢

慈懷既詢謀僉同應依議允從所請但朕將以明年秋幸
五臺經太原厯嵩洛趙魏回鑾已涉冬令南巡之舉
當在辛未年春正我

聖母六旬萬壽之年也將見巷舞衢歌騰歡獻

祝稱朕以天下養之至愛上以廣承

歡之慶下以慰望幸之忱益深嘉悅屆期諏吉以聞嚮道
人員朕酌量先期簡汰前往清蹕所至簡約儀衛一

切出自內府無煩有司供億至行營宿頓不過偶一
經臨即暫停亦不逾旬日前歲山左過求華麗多耗
物力朕甚勿取曾經降旨申飭明歲晉豫等省以及
江南俱不可倣效至名山古蹟南省尤多祇應掃除
潔淨足備臨觀而已無事崇飾倘有傾圯隨宜補葺
悉令動用官項且有吉慶所奏淮商願捐之項可以
報銷但當核實不得任有司浮冒其民間張燈結綵
聖祖嘗以為戒載在方冊宜共恪遵其慎勿以華侈相尚

所司通行曉諭其一切應行典禮著照所議行

乾隆十五年正月二十八日

上命軍機大臣傳諭兩江總督黃廷桂等曰朕巡幸江浙問俗觀風清蹕所至除道供頓有司不必過費周章已經屢降諭旨至川原林麓民間塚墓所在安厝已久不過附近道傍於輦路經由無礙不得令其移徙即如直屬近畿常經車駕往返及由都城以至西苑所司平治道途雖觀瞻所及間或蔽以布帷管蒯

之屬曠野中竟不為障蔽南省係初次辦差恐未盡
悉在督撫等仰體朕意自能妥協辦理而臣工中有
陳奏及此者雖屬過慮但既有此言應令該督撫等
留心體察戒飭承辦各員無得藉端輕議遷廢致滋
紛擾將此傳諭知之

乾隆十五年二月十九日

上命軍機大臣傳諭兩江總督黃廷桂等曰朕省方駐
蹕之所扈從人等所需米糧柴草地方官招集貿易

人預先運備以便臨時買用又恐市價昂貴復官為
備辦以平市價原係意美法良但現在山西每人給
與價票驗票發賣以致諸弊叢生或有以一人而兼
領數人之票者或有不肖之徒多取官票賤買貴賣
從中射利者殊與隨從人等無益現在已令停止嗣
後如遇巡幸凡扈從官兵需用之物該地方官但招
集商人並官為運備以期貨物充裕市價公平不必
發票來年巡省江浙即著照此例行可一併傳諭該

督撫等知之

乾隆十五年四月初六日

上命軍機大臣傳諭兩江總督黃廷桂曰據漕運總督
瑚寶奏到二摺一稱明年巡幸江浙經王大臣等議
准每省截漕十萬石以資平糶但江省經臨之所站
多地廣原議之數恐不足普及等語朕思十萬不敷
請增五萬即揆諸瑚寶本意亦屬片言可了乃輟轉
費辭連篇累牘並往復咨商浙省多生支節轉于事

理不明又奏臨幸時糧艘豫籌迴避一摺詞語亦瑣
碎冗雜披閱之下總未明晰辦理南巡差務有事關
漕運者漕臣自不得稍存推諉之見但看來瑚寶辦
事糊塗必致多費周章仍不妥協著傳諭黃廷桂江
省一切事務原屬該地方應辦之事著伊悉心籌酌
將瑚寶原奏二摺抄錄令其閱看所有應行先事辦
理之處逐一詳悉奏聞

乾隆十五年五月初七日

上諭內閣曰朕明春巡幸江浙經王大臣等議准每省截漕十萬石以資平糶朕已先行今據總督黃廷桂等奏稱巡幸江南經臨之所站多地廣原議之數恐有不敷再請截留五萬石等語著照所請再截留漕糧五萬石俾糶用充裕其作何截留及應在何處平糶該督黃廷桂等即行會商妥協辦理

乾隆十五年八月十六日

上命軍機大臣傳諭浙江巡撫永貴等曰據總理行營

王大臣等議奏此次南巡隨帶船隻行令倉場衙門
照議定之數預備一摺朕思該督黃廷貴等現在辦
差所有恭奉

太后御舟及乘用各船自必先期敬謹籌備即朕御用
之船應令酌帶亦不必按照各項名目重複辦理著
傳旨詢問該督等如彼處既經辦理妥協則通州帶
往船隻無庸多備況南省原係一水可通之地若江
省備船足用則自江至浙何須遽為更換該撫永貴

亦不必另行預備將此一併傳諭知之

乾隆十五年八月二十八日

上諭內閣曰朕明春巡幸江浙淮揚河路運鹽船隻未便絡繹往來現據兩淮鹽政吉慶奏請于本年十月將鹽觔預運四十萬引以資接濟朕思該商等先期趕辦一切起撥掣貯無不耗費著加恩將本年冬季所運之辛未絀鹽准其每引加耗二十觔俾商力充裕自與江廣民食有益該部即行文該鹽政知之

乾隆十五年十月初五日

上諭內閣曰朕明春巡幸江浙所過道路橋梁該地方官現在以次預辦應遣嚮導大臣覆加查看著兆惠努三就近自開封府馳驛前往並傳諭該督撫等一切供頓辦理務從簡樸毋得徒尚紛華以滋糜費

乾隆十五年十月十四日

上諭內閣曰朕明春巡幸江浙曾經降旨每省各截留漕糧十萬石以資平糶之用今據永貴摺奏溫台各

欽定四庫全書

御定四庫全書
卷二十五

屬今歲秋收稍薄米價未免增長等語著將浙省庚午年漕糧再截留五萬石俾糶用充裕民食有資所有截留撥運事宜仍著該撫詳悉酌籌妥協辦理該部即遵諭行

乾隆十五年十一月初一日

上命軍機大臣傳諭兩江總督黃廷桂等曰從前恭遇皇祖聖祖仁皇帝南巡時自順河集以達江口皆係河臣派撥河兵以供舟行挽緯之用渡江後則由江省地

方官僱覓民夫更替及行至浙江交界該省換纜亦另用僱夫應差此舊制也朕明春巡幸江浙聞江省督撫河臣會商擬於渡江後仍用河兵挽繹以省募夫接替之煩惟浙江因地屬隔省尚欲遵循昔年僱夫成例朕思兩省本屬一水可通若江省槩用河兵而浙省又別行召募往來守候未免紛繁兵丁向隸河標舟行乃其素習且在江省經行已久亦必益就熟嫻若即令其隨至浙江一路就便應用較之臨期

鳩集之夫自為有益況浙省本有僱夫工價若即以之加給河兵在伊等既可獲資斧之需而浙省地方官并得省僱募之役彼此均覺安便著傳諭該督撫等令其會同河道總督高斌張師載就近一體通融籌酌定議奏聞惟期公務有裨毋得存此疆彼界之見

乾隆十五年十一月二十六日

上諭內閣曰明春恭奉

聖母皇太后鑾輿巡幸江浙于正月十三

祈穀禮成日啟駕

同日

上諭內閣曰朕頻歲巡幸直省問俗觀風一遵

祖制入疆考績既足利益民生而扈從官兵亦得練習勤勞修明紀律所關甚鉅者也所有行營供頓悉出內帑絲毫不以擾民道路橋梁原准開銷正款且更特賜公項俾通融協濟該督撫等量力措辦儘足敷用即或以大員俸入既豐稍効忱悃尚非必不可行之

事從未有出于指派紳民者今歲時巡豫省見所司辦理非該撫及二三大員等力所能供因逐日召見藩臬道府等隨事詢察伊等奏對之間皆有畏首畏尾之意朕知其辦理不善詢之該撫而鄂容安初尚欲含糊了事及加嚴詰一一據實奏明出自通省士民捐輸朕本欲即治其罪念伊父大學士鄂爾泰宣勞有素伊在巡撫任內二年以來頗改其好名舊習而諸事黽勉出力且因朕問亦即行據實奏明尚與

始終欺隱者有間是以降旨切責姑免其交部議處
至於富明身任藩司與該撫公同辦理乃至朕回鑾
日援藩臬三年期滿之例奏請來京朕見朕當即降
旨伊於行在屢經召對不應遽請陞見顯係取巧乖
張交部察議且明指其非出於糊塗拘泥必因見朕
深責鄂容安故為此奏如准其來京遂得於召見時
乘機卸責此其巧獍居心殊不可問令軍機大臣等
傳旨申飭富明令其明白回奏今回奏摺內果稱諸

凡與撫臣會同商酌並無異議是鄂容安辦理此事
竟為富明所賣不能逃朕洞鑒矣富明已照部議降
調朕在中州時見該撫不能仰體朕心冒昧辦理恐
江浙督撫等聞風效尤將以觀風布澤之盛典轉成
地方官科斂累民之私計因即遣兆惠等由開封馳
至江浙宣布朕意俾督撫知所做戒今兆惠回京覆
奏江浙督撫並無派累朕心稍釋朕為海內蒼黎蠲
免正供至數千萬尚所不惜豈因省方盛舉轉惜多

費數十萬金而乃需民力捐輸耶即謂感恩趨事實
出羣情所願而農民非富商可比該督撫亦應明諭
朕旨早行禁止方為知輕重之大臣豈可因循從事
著將朕在中州訓飭鄂容安並同富明前奏傳諭鄂
容安各諭旨宣示中外俾共知朕意科道等惟以撫
拾陳言及枚舉細故為盡職似此有關政體之事何
不叅奏著通行申飭朕已明頒諭旨亦不必再行瀆
奏

乾隆十五年十二月十六日

上諭內閣曰明歲恭逢

聖母皇太后萬壽之年朕於新正恭奉

鑾輿巡幸江南浙江省方觀民入疆考績式遵

祖烈慶典斯行東南父老共效嵩呼洵昇平之盛事惟念

江浙二省襟帶江湖程途稍遠自

皇祖聖祖仁皇帝南巡以來

異數隆恩昭垂史冊迄今四十餘年朕俯從望幸之忱倍

切勤民之隱前於大學士九卿等議准兩江總督黃
廷桂等一摺已降旨諄切曉諭又特遣嚮導大臣兆
惠努三等前往面傳諭旨務從儉約一切供頓絲毫
不累民間凡地方大吏職任旬宣自能仰體朕心遵
旨辦理但恐地方有司奉行不善或窮鄉僻壤未及
周知是用再行申諭各該督撫及所屬官民人等尚
其凜遵前旨共期撙節以敦善俗以導淳風如所在
行宮與其遠購珍奇雜陳玩好不如明憲淨几灑掃

潔除足供信宿之適也經過道路與其張燈懸綵徒
侈美觀不若葺屋茅簷桑麻在望足覘盈寧之象也
闌闌通衢人烟稠密正以見懋遷有無之樂不得因
道路湫隘俾遷移屢舍或至商民失業也朕翠華所
至念切民依惟期宣達羣情勤求治道上以奉

慈顏之悅豫下以荅黎庶之瞻依凡屬虛文浮費概宜實
力摒除用光鉅典其扈從滿漢文武大臣官員侍衛
等皆當奉公守法不得與地方官往來交際潛通餽

遺兵丁以及隨從人等著該管大臣各嚴加約束經
行所至不得稍有滋擾春苗遍野無得踐踏違者察
出從重治罪務令白叟黃童普霑膏澤共樂恬熙副
朕問俗觀風行慶施惠之至意

乾隆十五年十二月二十二日

上諭內閣曰朕明歲南巡江浙省方問俗務使民商樂
業肆不改廛如京口諸處為南北咽喉百貨叢集軸
輻銜尾皆民間日用所資不可稍有間缺恐地方有

司因御舟將至惟使河道肅清先期于各處早為攔阻以致商賈裹足不前市價昂貴於民生殊多未便著速行傳諭各該省督撫酌量辦理祇可於三五日前稍令避入支港俟過即放遄行以副朕便民卹商至意該部遵諭速行

乾隆十五年十二月二十七日

上諭內閣曰明歲南巡鹵簿不必帶往

乾隆十六年正月十三日

上諭內閣曰朕此次巡幸江浙聞士民父老念切近光
其闌闌通衢人烟輻輳之所瞻仰者既足慰望幸之
忱而朕亦得因以見閭閻風俗之盛誠恐地方有司
因慮道路擁擠或至先期攔阻用是特行申諭如經
過村巷果屬湫隘難容自應量為曉諭令其散處路
旁毋致喧擾若道路寬廣清蹕所經毋虞擁塞不得
概行禁止以阻黎庶瞻就之誠著即傳諭各督撫知
之

乾隆十六年正月十六日

上諭內閣曰直隸州縣內上年間有被災之處當諭該督方觀承照例加意撫恤復經降旨將十二月內應止賑各戶加恩展賑一月貧民雖不致失所但今東作方興被災貧民未免仍屬拮据朕巡幸畿甸軫念維殷著再加恩將七八分災之極貧九十分災之極次貧各加賑兩個月六分災之極貧七八分災之次貧各加賑一個月令該督方觀承轉飭各屬俾得均

霑實惠以資力作該部遵諭速行

同日

上諭內閣曰直屬上年偏灾州縣現在降旨加賑有需用米石之處著將河南本年運通粟米截留十萬石交總督方觀承酌量辦理該部遵諭速行

乾隆十六年正月二十五日

上諭內閣曰向例鑾輿巡幸經過地方官員應行接駕由鴻臚寺具奏里數請旨臨時該寺帶領接駕至駐

蹕後復奏聞帶領行禮朕入疆考績地方大吏隨營行走不時召見卽州縣各官凡有承辦差務者業已於路旁隨便跪接此皆不在帶領行禮之例其帶領行禮者非散員卽武弁教職充數之人此何為者而鴻臚寺官員先期傳示不無滋擾嗣後凡應行接駕人員祇令鴻臚寺在京奏請里數得旨行知其一切繁文及接駕後赴鴻臚寺投遞職名概著停止以示朕行簡務實之意

乾隆十六年二月初三日

上諭內閣曰上年東省雖獲有秋而蘭山等七州縣偶被偏灾加恩賑恤民食固不至缺乏但農事方興麥秋尚早清蹕所經見蘭山郟城二縣民氣似遜他處深為軫念著將蘭山郟城二縣極次貧民俱加賑一月其未經過之嶧縣平度州膠州高密昌邑五處被災稍輕著將極貧之民加賑一月令該撫準泰查明辦理務使均霑實惠該部遵諭速行

乾隆十六年二月初十日

上諭內閣曰上下兩江有被灾稍重之處曾經加恩將極重之宿州靈璧虹縣五河宿遷邳州睢寧海州沐陽等處次重之鳳陽臨淮懷遠鳳臺壽州霍邱清河桃源安東等處分別加賑朕車駕南巡所有經臨之宿遷桃源清河三縣見其民氣遠遜他處並將所借籽種銀兩全行豁免今聞該地方官展賑之事尚未開期朕省方問俗念切民依若地方官借辦差之名

致窮黎嗷嗷待哺殊非仰體朕痼瘼在己之意著布
政使永寧星速親往督率該府州縣等即日按戶開
賑並傳諭黃廷桂飭令該州縣正印官不必辦差即
回本任辦理散賑務俾均沾實惠朕回鑾時或尚有
不能妥協之處惟永寧是問

乾隆十六年二月二十五日

上諭內閣曰朕命駕南巡周覽風俗觀民察吏惟日兢
兢三吳尤素所厯念也粵自我

皇祖聖祖仁皇帝巡幸東南先後六舉歷今四十餘年盛典昭垂衢謠在耳頃者入境以來白叟黃童扶攜恐後就瞻愛戴誠意可嘉朕已疊沛恩膏廣敷渥澤惟念大江南北土沃人稠重以百年休養戶口益增習尚所趨蓋藏未裕紛華靡麗之意多而樸茂之風轉有未逮夫去奢崇實固閭閻生計之常經而因時訓俗以宣風而布化則官茲土者之責也其尚勵乃實心以行實政無忝教養斯民之任凡茲士庶更宜各

敦本業力屏浮華以節儉留其有餘以勤勞補其不足時時思物力之維艱事事惟奢靡之是戒將見康阜之盛益臻父老子弟共享昇平之福朕清蹕所至有厚望焉

乾隆十六年三月初一日

上諭內閣曰經史學之根柢也會城書院聚黌庠之秀而砥礪之尤宜示之正學朕時巡所至若江寧之鍾山書院蘓州之紫陽書院杭州之敷文書院各賜武

英殿所刊之十三經二十二史一部資髦士稽古之學

乾隆十六年三月十三日

上諭內閣曰朕省方觀民茂求上理前因浙省士庶誼切急公正供概無宿逋頒諭嘉獎誕布特恩頃翠華蒞止周覽土風雖與三吳繡壤相錯而閭閻趨尚較吳稍樸但浮競之習舉所不免其蓋藏未裕均也凡爾封疆大吏暨監司守令俱有教養斯民之責當以

移風易俗為己任詎惟簿書期會為克盡乃職其在
小民則宜崇寔去奢雍睦敦讓相勉于孝弟力田以
臻仁壽之俗將見化行俗美有進而日上者茲當旋
蹕用申訓諭其善承朕意毋忽

乾隆十六年三月二十二日

上命軍機大臣傳諭兩江總督黃廷桂等曰時屆暮春
朕回鑾所至青疇彌望二麥既已抽芒新苗亦將出
水朕心甚為欣慰但沿途耆民婦孺紛聞載道翠華

一過則皆隨行恐後在民情之愛戴雖所嘉許而接隴連畦或致踐踏殊可惜也著傳諭該督曉諭百姓許其路傍踴接不必追隨遠行以致擁擠有損青苗但行勸諭不必令兵驅逐禁止俾知朕愛民重農之意

乾隆十六年四月初七日

上諭內閣曰此次隨從人等至順河集登陸後所用船隻仍應各回生理但恐閘口擁滯多被攔阻伊等窮

苦船戶回空既無催值又致停泊久候何以資生著
派侍郎雅爾圖嵩壽會同將軍西爾們總漕瑚寶往
順河集一帶將此項回空船隻于二三日內令其盡
行過閘以示體恤

乾隆十六年四月二十一日

上諭內閣曰日食天變之大者自古重之顧僅以引咎
求言虛文從事夫豈應天以實之義乃者五月丁酉
朔日有食之朕自惟宵旰憂勤無時不深乾惕寧待

懸象著明始知戒儆然遇災而懼罔敢不欽戒慎修
省惟崇實政行在鑾儀衛早晚鼓角是日著停止一
日以示撤懸齋戒我君臣當就常存之敬畏倍加謹
凜益修實政即如朕省方所至戲臺綵棚龍舟燈舫
俱可不必朕向來巡幸地方官惟修治道途此外一
無華飾自乾隆十三年東巡該撫等于省會城市稍
從觀美後乃踵事增華雖謂巷舞衢歌輿情共樂而
以旬月經營僅供途次一覽實覺過于勞費且耳目

之娛徒增喧聒朕心深所不取第先期業經預脩今
歲恭遇

皇太后萬壽兆庶亦藉以申祝嘏之忱是以俯順民情至
朕待督撫有司惟因其能實心辦事令地方日有起
色方加恩獎予而不知朕心者未必不以辦差華美
求工取悅為得計將玩視民瘼專務浮華此風一開
於吏治民風所關者甚大嗣後尋常行幸槩不准行
違者以違制論並諭中外知之

乾隆十八年十月十三日

上諭內閣曰朕巡幸經過地方所有道路橋梁自應照例辦理至道旁茶棚一項隨從官員原無暇憇憇徒供僕隸人等蹂躪作踐而地方官又多此一畚預備甚屬無謂嗣後俱著停止

欽定南巡盛典卷二十五

欽定四庫全書

欽定南巡盛典卷二十六

恩綸

乾隆二十年三月二十日

上命軍機大臣傳諭兩江總督尹繼善等曰尹繼善奏
南巡一切事宜現在立定章程預為籌備等語已於
摺內批諭矣西北兩路現有軍務如成功迅速則於
奏凱策勲後舉行省方問俗之典實屬應行之事總

之南巡之遲早以軍務告竣之期為定應俟朕頒發諭旨摺內既稱現在預為籌備亦所謂成事不說然儘可從容辦理不必過於急遽況此次南巡與從前初次籌備諸事草創者不同如各處行宮及名勝之地前次既經修建雖已閱數年亦止須稍加葺治可資頓宿而備觀覽足矣其所需經費可將兩淮運庫應解內府閒款銀內撥給十數萬兩交與該督等一切均於此內動用斷不可令商人捐貲亦斷不可扣

地方各官養廉卽如直隸州縣朕歲時經歷其辦差
悉從簡便近年以來復經核定章程於官民絲毫無
累除修路及尖營地面外片席隻木不許用地方官
始無以藉口尹繼善等諒所深知自能仰體至前次
沿途羅列臺閣故事一切務為美觀不但徒滋糜費
不必踵行且朕車駕所經周覽閭閻省視農作凡事
關吏治民風延覽不暇又何用此粉飾增華徒溷人
意為也所過省會州郡士民懽忻瞻仰有設綵棚者

案以申愛戴之誠自可不禁但聽其出於本意不必
官為指派惟朕恭奉

皇太后渡江時前次辦有小船數十隻既可衛護大舟而
中流植旆鳴鉦指顧間初不覺江濤之浩淼足以仰
承

聖母慈懷此事仍應照前辦理其餘一應事宜俱令尹繼
善酌量撙節妥協籌備靜聽軍務就緒降旨遵行此
時慎勿先事張皇徒令遠近傳聞致滋揣度也將此

詳悉傳諭尹繼善并寄莊有恭吉慶等知之

乾隆二十年五月十四日

上命軍機大臣傳諭閩浙總督喀爾吉善等曰前尹繼
善奏請明歲南巡預備一切事宜已降旨俟西北兩
路軍務告竣後頒發諭旨遵行此時有預備處只當
從容籌畫無事張皇令兩路征兵所至準噶爾諸部
望風投款接踵歸誠看來即日已可就緒省方問俗
自屬應行之事江浙地境毗連所有應行預備事屬

相等但俟降旨後始行籌備未免急遽著傳諭喀爾吉善或當先期飭備前經臨幸各處止須畧加葺治以資頓宿備觀覽足矣上次過於繁費此番俱可不
必紹興毋庸前往即西湖中所需

皇太后及朕御舟各備一二隻其餘隨侍各載小艇毋須多備船座以滋糜費其馬匹一項江省已令將現需馬匹開數具奏交軍機大臣代為籌辦浙省須備馬幾何不數幾何亦將如何委員採買如何定價之處

詳悉奏聞一併交令籌辦至一應費用若扣各屬官
養廉及令衆商損資皆斷不可行浙省商力尤非兩
淮可比兩淮尚不准捐輸何況兩浙該督可行文普
福於應解內務府閒款內撥銀十萬兩預備浙省辦
差之用諸事較前務加簡樸稱朕觀風省俗之意其
或過於糜費務事華飾不惟不能邀朕嘉悅將轉致
取咎矣該督酌量應於何時前赴浙省親為料理先
期奏聞將此詳悉傳諭知之

乾隆二十年六月初三日

上命軍機大臣傳諭兩江總督尹繼善等曰明年南巡一應預備事宜已降旨該督撫等令其撙節妥辦矣所有各處行宮內從前皆陳設玩器此等物件或係假借應用或用重價購買承辦之員徃徃張皇其事藉以邀結上司而對人則苦稱賠累即鄉紳舖戶亦紛然傳為口實在朕不過偶爾駐蹕而伊等先期多方覓置至臨時又或照料不及易致遺失甚至不肖

家人胥役即有乘間藏匿者種種情弊俱所不免此際南巡除揚州之高旻寺行宮原係商人自行置辦應仍聽其預備但須交收清楚外其餘各處行宮概毋得陳設玩器惟潔淨軒窗布置裊褥足供頓宿可矣若羅列寶鼎以圖飾觀甚屬無謂殊可不必將此傳諭該督撫等務各凜遵倘仍前預備必於尹繼善喀爾吉善等是問

乾隆二十年六月十三日

上諭內閣曰大學士陳世倌協辦大學士蔣溥等奏稱江浙士庶望幸情殷請於明歲再舉南巡一摺朕於乾隆十六年巡幸吳越迄今已越五載該督尹繼善喀爾吉善等均曾具摺奏請朕因西師尚未凱旋未經允准現今膚功迅奏荒服牧寧南省民風吏治時厯於懷而高堰堤工尤數郡生靈攸繫上年告竣以後正當親加察勘前降旨於明歲春月展謁孔林著允大學士等所請於禮成之後敬奉

聖母皇太后鑾輿順道前往江浙以抒勤民之隱而慰望
幸之忱朕省方觀民入疆考績維期勤求實政宣達
羣情一切供頓均出內府絲毫不以擾民地方官毋
得指名儲備令衆商捐輸及扣各屬養廉察出定行
嚴加究處前者巡幸南省時屢飭各督撫務從簡樸
而所至尚覺過於華飾喧溷耳目此次行宮及名勝
憩息之地悉仍舊觀但取灑掃潔除概毋增一椽一
瓦毋陳設玩器城市經塗毋張燈演劇踵事增華巡

覽所及各督撫等果能安輯井疆康乂蒸庶俾人敦
禮讓俗慶盈寧朕自深為嘉悅若其徒事華靡致飾
觀美耗有用之財侈無益之費適以自滋罪戾甚無
取焉各督撫及所屬官民人等尚其善體朕心以副
朕觀風問俗行慶施惠之至意

乾隆二十年六月三十日

上諭內閣曰巡省所過城邑除道清塵足矣前次南巡
蘇州揚州城內街衢間張設棚幔南方多雨且街窄

簷低而上施綠幕既不開與復滋糜費甚無謂也該督撫其飭禁之

乾隆二十年七月初七日

上諭內閣曰朕時巡江浙已屢降旨令該督撫等毋事浮糜毋從簡樸並飭禁一切商捐陋習乃聞前次南巡時浙省辦差至有當商捐費者此斷不可著再行曉諭嚴加禁止朕清蹕所經觀民間俗關政治之大端即動用數十萬正帑亦何不可而必取給於捐項

乎該督撫等宜仰承德意撫恤黔黎苟徒以鋪張華
麗炫溷耳目至派累各商鋪戶使不肖胥役乘機滋
擾侵肥是以惠民之典而轉以累民豈朕巡幸本意
亦豈所以慰兆庶望幸之忱耶若仍出此朕惟引以
為戒不當俯從所請矣如西湖中船隻自

皇太后及朕御用一二舟外其隨侍人等原可各載小艇
毋庸多備船座以滋糜費再所過城市民居因迎候
鑾輿各出誠敬之意於其門前香燈懸綵者自可不

禁其行宮陳列玩器蘇揚城郭街衢間張設棚幔已
有旨禁飭至沿途水次從前俱設燈船戲船臺閣俚
俗游玩之具此不過地方吏役及民間游手好事之
徒藉名苛斂尤當通行嚴禁該督撫等其凜遵毋忽
乾隆二十年九月十三日

上諭內閣曰喀爾吉善等奏稱明歲南巡請照例截留
漕糧備用等語著照所請准將浙省本年應運漕糧
截留十萬石以備來春之用該部即遵諭行

乾隆二十年十月十四日

上諭內閣曰前經降旨於明春躬詣

孔林虔申祭告爰允江浙臣工暨該督撫等奏請便道
南巡一切事宜務從簡約該督尹繼善來京面請訓
諭酌定章程近聞八九月以來江蘇所屬各州縣衛
卑下之地秋霖致潦魚有蟲傷亟宜賑卹現命截漕
撥粟多方儲備毋令小民稍有失所但稽查散賑必
須地方官親身經理春間青黃不接之時尤為緊要

若因除道迎鑾而賑給稍有遺濫使澤不下逮究非
朕意也夫巡省本以勤民辦差與賑務孰重南巡俟
明歲西成有秋該督撫等再行請旨尹繼善著速行
回任會同該撫等確按災地情形董率屬僚實力妥
辦副朕嘉惠元元痼瘼在抱之意其明春躬祭
孔林典禮仍著各該衙門照例預備

乾隆二十一年正月初二日

上諭內閣曰上年江浙兩省截留漕糧共一百一十餘

萬石原為地方賑卹之需而其中亦有因朕南巡先期奏明備用者今思該二省現在歉收民食必須充裕方可有備無患雖屢經降旨多方撫卹而將來青黃不接之候小民餬口維艱實堪軫念恐該督撫等拘泥前奏或留其有餘以致澤不下逮究非朕意也所有江省截漕一百萬石浙省截漕十五萬石著交該處儘數賑糶撥用各督撫等其董率屬員善為經理務俾窮黎均沾實惠副朕子惠元至意該部遵

諭速行

乾隆二十一年九月二十日

上諭內閣曰昨歲江浙督撫等據士民呈詞籲請南巡朕已降旨俞允後因江蘇所屬偶被災祲地方各官皆有應辦賑務朕恐伊等因除道清塵之役轉於民事稍有妨誤則殊非朕眷顧羣黎之本意復經特諭停止今據兩江浙省督撫諸臣合詞奏稱西成有慶臣民望幸實深請於明歲再舉巡幸之典南省民風

吏治時厯朕懷茲當歲美人和之候省方觀民入疆
考績正可抒朕勤民之隱而高堰堤工告竣後亦當
親加察看著允該督等所請於明春時巡至於一切
供帳頓次絲毫不以累民地方官承辦差務寧樸勿
華從前所降諭旨甚明該督撫等其善體朕心以副
朕觀風問俗加惠斯民之至意將此通行傳諭知之
乾隆二十一年閏九月二十四日

上諭內閣曰據兩淮鹽政普福奏稱明春南巡所有淮

揚一帶運鹽船隻於今年十月內令該商等先期預
運四十餘萬引堆積儀所以資來歲江廣食用等語
此項鹽引先期預運堆貯不無滯耗著加恩照十六
年之例每引加耗二十觔以裕民食以紓商力

乾隆二十六年閏九月二十六日

上命軍機大臣傳諭直隸總督方觀成曰江省辦理官
馬以備明春差遣之用而直隸所買官馬為數既多
現在亦無急需之處著方觀成即親赴張家口據實

查明已買若干價值若干其已買得者令委員即送回南未足數者於直省現買數內撥往將南省馬價照原值扣存俾南省應差無誤亦不致藉詞價昂冒銷

同日

上諭內閣曰朕明春巡幸江浙所有供宿頻次皆出自帑項絲毫不以累民第扈從官兵以及外省接駕人等輻輳雲集經過地方錢米價值恐一時或至騰踊

著將運京銅鉛兩省各截留十萬觔添爐鼓鑄減價發賣并將該二省應運本年漕糧各截留五萬石減價平糶以裕民間日用該督撫其各飭屬員實心經理毋使吏胥滋弊務俾均沾實惠該部即遵諭
乾隆二十一年十月二十八日

上諭內閣曰程盛修奏南巡接駕之在籍官員請限以品級並守制諸臣停止接駕一摺其所見非是朕稽古時巡省方問俗黃童白叟皆得懽迎道左共申愛戴其

在籍大僚夙叨恩遇自當遂其覲光之願即小臣中
疎遠罷斥者既曾沾一命亦何至禁阻令不得與齊
民齒此與朝儀之定頗威以明體制固不同也雖此
等接駕人員不無望恩幸澤之意然在朕自有權衡上
南巡時亦俱就其罷斥情罪酌量分別其間有棄瑕
錄用者餘或加恩復其原銜或降等給以頂帶未嘗
概得濫邀異數此爾諸臣所共知共見試問有因接
駕復用而劣蹟仍前昭著殃及百姓者誰乎至於守

制諸臣教孝作忠均關至性何曾概令其必出迎鑾
然其中有將屆即吉之期或林墓之事已畢者而竟
閉門不出於心自有所不安即如親老終養者自應
不離親側然里門咫尺而不令其一展葵向之誠乎
且此等亦各揆時度理即不能來迎者原未嘗罪一
人也程盛修既有此奏恐外間無識之人或未免尚
有拘牽之見可將此通行曉諭知之

乾隆二十一年十一月二十九日

上諭內閣曰朕恭奉

皇太后鑾輿南巡江浙於來年正月十一日起程

乾隆二十一年十一月三十日

上諭內閣曰前已降旨江浙兩省各截漕五萬石以備平糶之用但明春巡幸所經江省地方較多五萬之數恐尚不敷著再截留五萬石分貯平糶俾市價不致昂貴於民食尤有所濟該部即遵諭行

乾隆二十二年正月二十日

上諭內閣曰山東之濟寧金鄉魚臺滕嶧等五州縣上年偶被水災已降旨於加恩賑恤之外加賑兩個月以資接濟今翠華經臨念閭閻春作方殷麥秋有待著再加賑一個月該撫其董率屬員實力查辦以副朕軫恤災黎至意

乾隆二十二年二月初二日

上諭內閣曰上年江南之淮徐海等屬被水偏災除照例賑恤外復經降旨分別被災輕重加賑一二三月

以資接濟令朕翠華南幸體訪民情而災地貧黎尤
深軫念著再加恩將下江被災之清河桃源銅山蕭
縣沛縣邳州宿遷睢寧海州沭陽徐州大河等十二
州縣衛及安東豐縣二縣同上江被災之宿遷靈璧
虹縣長淮等四縣衛毋論極貧次貧俱各加賑一個
月以普惠澤該督撫等其督率屬員妥協經理慰朕
懷保至意該部即遵諭行

乾隆二十二年二月初八日

上諭內閣曰江浙二省獄獄滋繁陳臬之司素稱劇任
茲朕巡省所至覃布恩膏黎庶均沾閭閻愷樂而有
罪之人囹圄桎梏實由自取亦何恤焉但念獄一成
而不變其中奸民之犯法者固多而無知悞蹈之人
亦時有況未抵於重辟尚可望其自新用播德音
以符寬大所有江蘇安徽浙江等屬軍流以下人犯
俱著加恩各予減等發落從此案牘一清在問刑各
官當益勵精勤期於明慎而凡爾百姓更宜各安本

業勉為良民勿謂曠典可以倖邀而輕國法也

乾隆二十二年二月十九日

上諭內閣曰上江所屬宿靈虹三州縣及長淮一衛去秋被水災黎其成災在六分以上者業已多方撫恤復兩經降旨加賑自可不致失所惟被災五分地畝定例既不成災不在給賑之內而其中有積水未消而不能種麥之處及已種春麥正月內又為毛城鋪減洩黃水淹浸者雖可播種大田而時距秋成尚遠

貧民生計不無拮据清問所及軫念殊深著加恩於
例借一月口糧之外再加借一月口糧以資力作該
督撫其董率屬員查明速辦

乾隆二十二年二月二十二日

上諭內閣曰朕於回鑾渡黃後由順河集至徐州閱視
河工朕即由徐州至曲阜展謁

孔林途經泰安登岱拈香本日仍回大營駐蹕可傳諭
鶴年預行備辦其登山路逕但須畧為掃除足供行

走即有窄狹之處或乘馬或用行山步輿即緩步徐行亦何不可者且

皇太后鑾輿並不登山切不可搭架天橋致多謁蹶

皇太后鑾輿仍由順河集舊路先至靈巖駐蹕可一併傳諭知之

乾隆二十二年二月二十三日

上諭內閣曰江蘇徐州府之銅沛邳豐蕭碭睢等七州縣上秋偶被偏災業經蠲賑並施并將新舊漕糧槩

行停緩第朕念該處俱係積歉之區民鮮蓋藏將來青黃不接之時正須設法調劑所有七州縣熟田應徵漕米二萬四百餘石著即截留本地照例糶借庶於民食更為充裕該部即遵諭行

乾隆二十二年二月二十八日

上命軍機大臣傳諭兩江總督尹繼善等曰朕於回鑾渡黃後前往徐州閱視河工所有營尖道路已有旨令其不必過求齊備至前次山東直隸因回鑾已值

初夏天氣炎熱搭蓋天棚此次尚可聽其搭蓋至於江南境內則尚在春和斷不可一律倣效其餘一切預備俱宜從簡看來該督撫等所辦未免較前加增即如沿河水營辦事草亭乃前次所無如此踵事增華所動何項徒資藉口其現有者俱著拆去可一併傳諭知之

乾隆二十二年三月二十二日

上命軍機大臣傳諭總河白鍾山曰上次南巡挽紲河

兵所需日費及製備衣帽銀兩俱於河庫公項動用
此次因清查公項之後該督等遂於各兵月餉內坐
扣所辦非是河兵挽紼甚為勞苦而更扣其月餉耶
可傳諭白鍾山令將挽紼河兵日費等項銀兩仍照
前例於公項內開銷不必坐扣還項以示朕體卹兵
丁之意

乾隆二十二年四月初六日

上諭內閣曰徐州等府屬州縣疊被水災業經蠲賑兼

施並截留徐州本處糟糧以供借糶昨車駕幸臨又復將所有借欠籽種口糧不分新舊概予豁免凡以曲體並施冀於災黎少濟今思該處倉儲未裕不可不預籌著再將本年現運漕糧截留五萬石存貯徐州等處以備不時之需其上江之鳳陽等屬頗年被侵小民艱於謀食並著截留糟米五萬石撥運鳳陽等處備用其酌截何幫糟船並如何分別收貯之處著該督撫等悉心區畫一面辦理一面奏聞該部即

遵諭行

乾隆二十二年五月初三日

上命軍機大臣傳諭兩江總督尹繼善等曰前據尹繼善奏稱江省官員有願捐養廉承辦差務之舉已面諭禁止凡一應費用俱令動項按款照數撥給不得分毫科派但恐臨時料理容有用浮於數之處亦未可定特傳諭普福令其撥給銀十萬兩交與尹繼善等酌量支用然不得因銀兩充裕以致屬員侵冒浮

銷總在該督撫等悉心綜核若此項銀兩僅足支給則已如不敷著再請倘尚有贏餘即留貯該省為下次之用此項報銷雖毋庸咨部核議然朕南巡地方公用有何不可對人言之事若有則是私弊尚未盡除矣其正項開銷之外凡所動用細數仍著開造清冊咨送軍機處以便存案著傳諭尹繼善等知之

乾隆二十二年十一月二十七日

上命軍機大臣傳諭兩江總督尹繼善曰今年南巡辦

理差務一切俱早定章程地方有司較前更為熟練
比之乾隆十六年生手初辦大相逕庭所有動用銀
數報銷奏冊何以至今尚未奏到可傳諭尹繼善即
飭經手各員速行據實開造亦不宜太遲並查較乾
隆十六年所用之數有無減省不可聽其任意浮冒
統於歲內具奏為是

欽定南巡盛典卷二十六

欽定四庫全書

史部

欽定南巡盛典卷

二十七

詳校官廣西道臣王天祿

欽定四庫全書

欽定南巡盛典卷二十七

思綸

乾隆二十三年九月三十日

上諭內閣曰兩江總督尹繼善等以河工告竣年穀豐收臣黎望幸情殷請于庚辰之歲再舉南巡令典等因合詞具奏朕惟東南河道民生時繫宵旰前者翠華載莅每切咨詢不敢自逸茲當大工既蒧澤國安

瀾於焉攬轡觀風上以驗曩時往來指畫之勤下以
考在事大臣宣化承流之績理亦宜之顧各督撫等
前後奏報工程披章如睹而嵇璜表曰修等又以親
承指示甫經復命回京條析敷陳情形頗悉乃者大
江南北年穀順成民氣和樂封函疊至仰見

上蒼福佑額手為南黎稱慶此意與封疆諸大吏共之猶
念積潦初除汙萊日闢正宜乘時勸諭俾瘠土盡化
膏腴以培元氣已降旨各督撫勸明濱河地畝有秋

獲雖登而小民牛犂籽種不能接濟致曠土尚有未
耕者並予格外加恩官為借給使得資東作而厚西
成其果盈寧之象與歲俱增則機杼倉箱熙恬滿目
其足以佐時巡風景者不更多耶且明歲車駕臨幸
索約爾濟又平定伊犁後若左右哈薩克東西布魯
特及回部各城以次平定歸降不無覲謁宴賚之典
車馬之煩所當少恤且歲屆辛巳即恭逢

聖母皇太后七旬大壽普天同慶如於是年敬奉

安輿重臨江浙庶幾省方問俗嘉地利之畢登喜生民之
益懋于以仰悅

慈懷壽祺康豫當推

恩錫福俯慰元元望幸之忱俟臨期另行降旨所有庚辰
年南巡之奏暫停舉行毋庸具摺固請先將此通行
曉諭知之

乾隆二十四年十月十八日

上諭內閣曰前據陳宏謀奏請截撥京銅五十萬觔加

鑄備用一摺部臣以未經分晰聲明業經議駁但念錢法關係閭閻日用前請五十萬之數原屬過多若酌量增加卯數以裕鼓鑄于地方亦屬有益著加恩酌半給撥二十五萬勦俾官錢流通以裕民用該部即遵諭行

乾隆二十四年十月二十二日

上諭內閣曰雍正五年恭值

皇考五十萬壽因會試舉人請于京城寺廟設立經壇以

申頌祝欽蒙

頒諭禁止並

勅各直省督撫毋得因萬壽進獻玩好

聖訓有云朕心惟以民安物阜為美薦賢舉能為貴倘督撫等秉公察吏實心為國行一利民之政勝於獻希世之珍薦一可用之才勝於貢連城之寶仰見我

皇考恭儉聖德實為萬世訓行朕嗣服以來屢諭各督撫等不得於方物之外別有進獻諒內外大小臣工無

不明體朕意開歲八月為朕五十誕辰惟恐臣僚中
或以萬壽聖節欲購覓珍奇共申祝嘏其各省士民
或且有設立經壇建立碑亭之事非先期詳悉傳諭必
將競事浮華徒滋糜費甚非所以勵官常惜物力也
朕心深所不取其飭禁之至在籍年老諸臣如尚書
沈德潛侍郎錢陳羣等若以隨班叩祝跋涉遠來亦
非朕優體老臣之意況歲屆辛巳恭遇

聖母皇太后七十大慶以新春敬奉

安輿時巡南服諸臣就近迎

鑾相見不遠又何必僕僕道路為耶著將此通行傳諭知之

乾隆二十四年十一月二十六日

上命軍機大臣傳諭兩淮鹽政高恒曰據尹繼善奏辛巳年應辦差務尚有上屆賞給銀十萬兩未經動用現在存貯等語著傳諭高恒再於兩淮鹽庫公項內酌撥銀三十萬兩交與該督尹繼善令其備辦充裕

毋致絲毫派累民間可也

乾隆二十五年八月初八日

上諭內閣曰獻歲恭逢

皇太后七旬萬壽於新春敬奉

安輿時巡南服俯慰士民顙祝之忱並順道閱視徐州石
堤及海寧塘工因降旨令該省地方官修整道路橋
梁照例預脩今歲大江以南在在豐收惟夏間雨水
稍多河湖甚長高寶興泰一帶低窪處所頗有漫溢

前因河臣等先後摺奏特傳諭尹繼善查明下游被
水之區預籌撫綏復恐地方有司承辦南巡差務轉
于賑恤事宜不能盡心經理是以諭令該督將實在
情形確查具奏候朕降旨酌緩巡幸今據奏到高寶
等處被水較重該處既現已成災亟宜以賑務為切
要南巡一事原不妨酌量改期該督身任封疆自當
權其緩急早為奏請何必待朕詢及始行入告耶所
有南巡應辦差務暫行停撤改于壬午春恭奉

慈輦以慰輿情仍可攬民風而昭盛典大差既經停止自
可肅心辦理賑務該督等務宜仰體朕懷董率僚屬
確按災地情形實力妥辦勿使窮黎稍有失所以副
朕痼瘼在抱之意該部即遵諭行

乾隆二十六年九月初三日

上諭內閣曰朕前降旨於乾隆二十六年恭奉

聖母皇太后南巡適江省各屬去秋偶被偏災因展期于
二十七年今秋高寶數邑入秋遇有風暴窪下田禾

不無傷損恐地方有司查賑辦差難以兼顧傳諭該督尹繼善令其查奏毋得稍事粉飾今據該督撫奏稱江省今歲秋收大勢豐稔高寶等處早稻已有收穫被水亦較去歲為輕應賑恤者不過數州縣儘可從容辦理而差務一切事宜早經預備

聖母七旬萬壽之後行慶施惠望幸彌殷等語所有明春南巡典禮着照例舉行

乾隆二十六年十月初三日

上諭內閣曰朕明春恭奉

皇太后聖駕南巡著照丁丑年例于江浙兩省冬兌漕糧
內各截留十萬石于水陸駐蹕地方分廠平糶著漕
運總督及各該督撫會同妥協辦理該部遵諭速行
乾隆二十六年十月二十七日

上諭內閣曰今年恭逢

聖母皇太后七旬大慶在籍諸臣來京叩

祝具見悃忱獻歲之初朕恭奉

安與時巡南服諸臣甫及旋里復當出境迎鑾僕僕道途
于林下高年諸多未便可諭諸臣今冬曾經赴闕者
明春毋庸越省候接在浙江者不必至江南在江南
者不必至東省如沈德潛即于蘇州錢陳羣即于嘉
興餘均視此為例副朕體惜至意

乾隆二十六年十一月二十日

上諭內閣曰高恒奏兩淮商人等呈稱世享昇平受恩
優渥明春恭遇省方盛典行慶施惠情愿公捐銀一

百萬兩以脩賞賚等語明歲朕恭奉

聖母安輿巡幸江浙一應推

恩錫賚俱經各衙門照例動用正項預脩第該商等奏稱
踴躍急公今既抒誠籲懇情詞肫切著于此內撥銀
三十萬兩交于尹繼善辦理差務即賞給兩淮二十
萬兩為伊等修理行營等項之需酌留十萬兩以脩
賞賜其餘四十萬兩著解交河南巡撫胡寶瑤充工
程賑恤之用該商等並著交部議叙以示嘉獎

乾隆二十六年十二月初四日

上諭內閣曰朕恭奉

皇太后鑾輿巡幸江浙于明歲正月十二日起程

乾隆二十六年十二月二十八日

上諭內閣曰向來巡幸所需車輛例由順天府用官價預為雇覓應用其中胥役人等多有乘機藉名抑勒需索諸弊為累閭閻此次南巡啟鑾伊邇順天府自已照例豫備著步軍統領衙門簡派員役查察如有

滋事情弊即行拿究以儆刁猾嗣後有應脩車輛著
交內務府總管大臣交會計司所屬大糧莊頭等設
法官辦既可供應無悞又可永斷因差滋弊根株其
悉心妥議具奏

乾隆二十七年正月二十日

上諭內閣曰去歲山東被水偏災各屬雖不如豫省之
重現在時當青黃不接例賑又應停止小民生計未
免拮据因傳諭該撫阿爾泰令將各處被災分數查

明具奏今據奏到被災較重之曹縣城武德州濟寧
魚臺五州縣著加恩無論極貧次貧俱行加賑一個
月其濱河次重之齊河金鄉嘉祥荷澤單縣定陶鉅
野濮州范縣臨清邱縣館陶恩縣夏津武城等十五
州縣成災在八分以上所有貧民及衛地貧軍亦著
加恩展賑一個月以資接濟該撫其董率屬員妥協
經理務俾閭閻均霑實惠副朕軫念窮黎之意

乾隆二十七年二月初三日

上諭內閣曰上年曾降旨于兩淮運庫內撥銀三十萬兩交與總督尹繼善辦理差務但恐尚有不敷著高恒于運庫內酌量再撥銀二十萬兩以為添補辦差之用

乾隆二十七年二月初五日

上諭內閣曰上年江省被災各州縣已疊頒諭旨加恩賑卹但念時值春和東作方興恐民力不無竭蹶著再加恩將高郵寶應甘泉泰州山陽安東桃源清河

銅山沛縣睢寧等十一州縣無論極次貧民俱加賑
一月至安徽省之太和亳州阜陽潁上靈璧五州縣
亦著一體加賑一月以示惠養黎元至意該部遵諭
速行

同日

上諭內閣曰宿遷一帶州縣地方濱臨大河向來歲收
率多歉薄現在巡行省視見閭閻氣象較前似覺稍
舒而生計未能優裕時值春和農功肇舉尚須加恩

接濟著該督等從優酌借籽種俾得從容東作以冀
有收該部遵諭速行

同日

上諭內閣曰朕巡省江浙所過地方並未禁止行旅將
來旋蹕時

皇太后御舟由水路進京程途尤為穩便昨巡漕給事中
洋海廼先期奏請自通州南下船隻悉令迴避所見
甚屬紕繆運河為南北通津舟楫往來相望即屆

聖母御舟經過時旁有支河港汊自可暫行引避設其地別無可避亦第附泊傍岸不致妨碍緯道足矣若豫事盡行飭禁則自春涉夏為日頗長以千里長河使行者久羈道路于事理全未通曉已傳旨申飭並傳諭經行各處一切如常放行但江浙二省水程更多有司不能曉事或有似此拘泥辦理者並著各該督撫即飭知沿河地方官凡商民船隻均行照常行走毋得稍有禁阻將此通諭知之

乾隆二十七年二月十八日

上諭內閣曰向來巡幸所至地方大吏預備燈船烟火頗覺繁俗頃在揚州適以哈薩克陪臣入覲聊示內地民情和樂之意是以聽其預備倘蘇杭等處悉仿而行之更屬不必朕省方觀民勤求治理即以幾暇適情則山川名勝儘足以供吟眺之資又何事徒資繁費為耶著將此傳諭知之

乾隆二十七年二月二十一日

上諭內閣曰卮蹕南巡之漢大臣籍隸江浙二省者著于迴鑾時酌量道路所便請假歸省

乾隆二十七年二月二十九日

上諭內閣曰朕稽古省方乘春布令而清理庶獄矜恤尤深用沛德音式照盛典所有江蘇安徽浙江三省軍流以下人犯俱著加恩各予減等發落凡親民之吏其諄切告誡俾知改過自新共享太平之福

乾隆二十七年三月二十三日

上命軍機大臣傳諭兩江總督尹繼善曰凡各馬頭地方只許鋪棕毯不許鋪紅黃等氈

乾隆二十七年三月三十日

上諭內閣曰朕巡幸所至凡地方預脩一切飾觀之具殊覺繁俗已屢降旨槩行斥禁因念回鑾直隸時節令遠近端午恐地方官不無點綴節景或于趙北口有供備龍舟之事著方觀承先期實力飭禁毋得稍踵靡文以副朕意

乾隆二十八年四月十一日

上命軍機大臣傳諭閩浙總督楊廷璋等曰工部議覆
楊廷璋等奏銷南巡動用欸項一本因該督等籠統
開報未將應用各項詳細聲明駁令據實刪減現已
明降諭旨加恩准其報銷矣此係出自朕之特恩不
可視為常例奏銷銀欸原宜慎重例係將前後動用
各項暨物料尺寸細數逐一分晰造報該部方可據
以察核若但籠統開銷何以信其並無浮冒且奏銷

時既可籠統則動用時必不能加意撙節此在督撫大臣可保其必無染指司道大員受恩簡用即不致因辦理差務混冒肥橐而其往來食用或不免藉端取給至于承辦之佐雜等官藉此含糊舞弊以為冒銷之地更勢所必有若以從前尹繼善奏銷江南辦差銀兩既降旨准銷今楊廷璋此本又得一例降旨將來遂至視為故事並不按照成例詳晰造冊仍前籠統開銷以至不肖官吏得以從中取利一經察出

則惟該督撫是問朕巡省所至凡行宮預備等項已屢經詳諭該督撫等一切務從簡樸從前三次辦理已不免踵事增華倘將來彼此效尤日甚一日何所底止且如朕在京及圓明園每日視事之所雖細如頂榻糊飾之類不過隨時粘補不求一律鮮華此亦廷臣所共知若以偶然駐頓之地當上屆已經整葺而小有滲剝不過畧加補苴便已妥協何必更增繁費前此地方官知朕絲毫不肯累民動以商捐藉口

殊不知官取給于商而商人所捐孰非民用所給自後該督撫惟應實力約省凡有所需用只許支取例給之項及前此賞用所餘據實冊報查核其商捐一節亦儘可停止又扈從官員並已給船乘載何須預脩公館在扈蹕大臣等朝夕侍直該班既不能四出居停其各衙門官員差使稍緩者即泊舟稍遠亦無難從容退食乃有司等輒以此為名致不肖胥役保甲等佔貼民房勒索滋弊此風斷不可長亦著嚴飭

禁止無得稍為寬假或大臣官員等自需住宿則聽其出資僦賃不許地方官代為購覓以杜擾累此後公館一事竟宜停止

欽定南巡盛典卷二十七

欽定四庫全書

欽定南巡盛典卷二十八

恩綸

乾隆二十八年十二月十七日

上諭內閣曰兩江總督尹繼善等合詞具奏請于乾隆
乙酉年再舉南巡之典以慰臣民顙望一摺朕惟江
浙地廣民殷一切吏治農功均關要計且襟江帶河
濱河近海之區籌護澤國田廬無一不重繫宵旰前

以壬午歲恭奉

安輿時巡周覽凡淮河水誌節宣牐壩啟閉以及杭屬塘
工勘建柴石料段諸事宜曾與封疆大吏目擊手畫
以期利濟羣生年來疊經督撫等疏報下河郡邑汎
水恬流並無漫溢唯是浙中海潮漲沙雖有起機大
溜尚未趨赴中壘是深所厯念而新修柴石諸塘亦
當親閱其工以便隨時指示又近日特遣大臣督修
水利如濉河荆山橋等處亦為數省灌輸喫緊關鍵

所以驗前功而程後效正惟其時矧東南歲時頻告
豐登洪惟

聖母皇太后福履康寧彌增純嘏于是承

歡行慶答士民望幸之忱稽典實為允協著照所請于乙
酉之春諏吉南巡其河工海塘應親臨省視者即行
先期預備至前次燈綵繁文暨扈從人員僱覓巨舟
簽佔公館諸禁已屢頒諭旨即朕所過行宮道路距
上屆為日匪遙祇須灑掃潔蠲足供頓憩不得稍事

增華勞費副朕仰承

慈豫俯順輿情之至意將此通諭各該衙門知之

乾隆二十九年五月初三日

上命軍機大臣傳諭兩淮鹽政高恒曰著傳諭高恒于
兩淮運庫公項內酌撥銀三十萬兩交與尹繼善為
乙酉年辦差之用

乾隆二十九年九月二十五日

上諭內閣曰朕明春恭奉

皇太后聖駕南巡著照從前之例于江浙二省冬兌漕糧
內各截留十萬石在水陸駐蹕地方分廠平糶即令
漕運總督及各該督撫妥協辦理該部遵諭速行

乾隆二十九年十月二十三日

上諭內閣曰朕明春恭奉

皇太后安輿巡幸江浙于正月初九日起鑾所有一應事
宜著各該衙門照例預備

乾隆二十九年十一月十二日

上諭內閣曰明春南巡江浙所過直隸山東及江浙等省地方其應辦差務原不過就屬員中酌量派委非各屬各員皆有承辦之責即派出人員于緊要民事自可先期趕辦俾案牘速清方為急公之道乃聞向來有司故習率以差務展限為詞所有民間詞訟等案任意稽延不為尅期完結豈朕察吏安民本意著傳諭各該督撫等即行轉飭所屬凡應理事件毋論派委不及者固不得因循推諉即派出人員其應辦

之事亦當乘此封印前後加緊料理倘有藉名遲滯
以易結之案遷延貽悞必待差竣辦理者即應力破
情面加之創懲使小民不致羈留拖累以副封疆表
率之任朕于該督撫等有厚望焉

乾隆二十九年十二月初四日

上命軍機大臣傳諭直隸總督方觀承等曰方觀承查
奏直隸辦差州縣出結一事所奏殊屬顛預此等積
弊固由地方官所用胥役長隨藉端開銷以便其中

飽之計遂爾盤踞把持牢不可破及至查究根源此等庸吏又安肯據實開陳自干罪戾該督從前既據屬員之言輒行入告追降旨詳查又以無從根究為詞殊不思若輩小人藉名舞弊固不足惜而車駕所經一切毫無供頓而長隨人等竟有以支應名色從中滋為口實其風猶可長乎在前此官更吏易此時即實有難于逐一質對之處而明春南巡在即現已先諭總理行營暨提督衙門沿途加意察訪該督務

須先期嚴飭地方官一體力行防範禁革如有另換名色別生弊竇者該州縣官立即扭稟總理行營處治罪倘不能查禁一經總理行營處察出則惟該督是問並傳諭山東江南浙江各督撫知之

乾隆二十九年十二月二十四日

上諭內閣曰前經禮部奏請于正月初五日舉行祭辛典禮是以降旨于初九日起鑾恭奉

皇太后安輿巡幸江浙但初五日在立春以前為時尚早

應俟春後初辛舉行於義方協所有

祈穀典禮著於十五日舉行起鑾之期著改為十六日
將此傳諭各該衙門並各該處知之

乾隆三十年正月十一日

上命軍機大臣傳諭兩江總督尹繼善等曰此次南巡
行聖公孔昭煥尚書嵇璜俱現在制中不必前來接駕
如伊等尚未起程該督尹繼善該撫崔應階可即傳
諭停止如業已在途亦即令其回籍

乾隆三十年閏二月初七日

上諭內閣曰朕時巡江浙清蹕所經恩膏疊沛軍民士庶無不忭舞臚歡而清理庶獄亦矜恤所宜速用循舊典以廣深仁著將江蘇安徽浙江三省軍流以下人犯俱加恩各予減等發落俾得改過自新勉為良善共享太平之福

欽定南巡盛典卷二十八

欽定四庫全書

欽定南巡盛典卷二十九

恩綸

乾隆四十三年十月初三日

上諭內閣曰大學士管兩江總督高晉閩浙總督楊景
素等合詞陳奏以江浙臣民望幸甚殷且河工海塘
皆冀親臨指示懇請於庚子春再舉南巡盛典以愜
輿情一摺朕於乙酉南巡回鑒時因耆孺攀戀情殷

曾許以翠華再莅然敬念

聖母皇太后春秋已高難以再奉

安輿長途遠涉遂諭江浙大吏不必更以南巡為請而江
鄉士庶愛戴依戀之情狀未嘗不往來于懷距今十
有四年其顙望悃忱自益諄切且自前巡閱定五壩
水誌以為展拓清口之準下河從此遂免水災嗣聞
黃河倒漾所繫甚重因酌定挑浚陶莊引河而諭薩
載籌辦河成而清黃交會處移遠清口不復有倒灌

之患但下游尚有停淤亦不可不除其流弊而一切
善後事宜若非臨莅閱視究不能悉其實在情形至
浙省海塘近來潮勢漸趨北岸深為厯念亦不可不
親為相度機宜今高晉等既有此奏著照所請於乾
隆四十五年正月諏吉啟鑾巡幸江浙便道親閱河
工海塘所有各處行宮座落俱就舊有規模略加葺
治毋得踵事增華致滋煩費至該督等以庚子年適
逢朕七旬萬壽欲就近舉行慶典則斷不可朕本意

以庚子年為朕七旬慶辰越歲辛丑即恭逢

聖母九旬萬壽斯則敷天同慶自當臚歡祝

嘏以抒萬姓悃忱今既不能遂朕初願尚復何心為已稱

慶况朕蹕途所經老幼歡迎扶攜恐後未嘗不顧而
樂之若經棚戲臺侈陳燈綵點綴紛華飾為衢歌巷
舞深所不取且非所以深體朕意也不特江浙臣民
不當為祝釐之舉即凡內外大小臣工於朕七旬萬
壽時亦均不得請行慶典以及進貢獻詩若伊等謂

欲藉以申其尊敬之誠是轉增朕心之不悅尚得謂之忠愛乎但天下士民遇朕七旬萬壽皆不免望恩倖澤此則情理之常朕亦何肯因不舉行慶典並靳恩施乎着於己亥年八月舉行恩科鄉試庚子年三月舉行恩科會試以彰壽考作人之盛至各省漕糧於乾隆三十一年普免一次茲蒙

昊天眷佑累洽重熙朕敬體天心愛養億兆用是再霽恩膏着於庚子年為始復行普免天下漕糧一次俾藏

富於民共享盈寧之福所謂欽福錫民慶莫大焉其
開科事宜着交禮部查例辦理其各省漕糧應如何
分年輪免之處着交戶部詳悉妥議具奏將此通諭
中外知之

乾隆四十三年十月二十日

上命軍機大臣傳諭兩江總督高晉曰昨已降旨允江
浙督撫等所請於乾隆四十五年正月啟鑾南巡並
諭令沿途毋得踵事增華致滋糜費矣至蹕路所經

水營行宮等事皆不能不需用度前四次南巡俱曾
賞給銀兩以資籌辦而督撫至道府等大員亦有稱
自捐廉俸者今春高晉在京亦曾奏及照上數屆之
例於伊等養廉內公捐備用今高晉楊魁俱有應繳
之項勢不能再捐養廉若止令司道等員公捐更屬
不成事體朕南巡省方觀民期使萬姓共臻安阜豈
肯令不肖官吏藉端科派方今府庫充盈因巡幸而
頒發帑金一切皆由公辦最為盛事朕亦無所靳惜

着傳諭高晉即將上四次南巡每次賞銀若干並查明現辦南巡差務需用銀兩若干通盤核計據實具奏候朕降旨撥給毋得絲毫派累閭閻高晉於高樸差家人李福到蘇私賣玉石一事既未盤詰查叅轉給以護牌其罪甚大朕不將伊革職治罪已屬格外施恩當如何感激圖報若於辦理南巡一事再不據實確核具奏並不能妥協辦理致有派累則是該督自取重戾不能更為曲貸矣

乾隆四十三年十一月初三日

上諭內閣曰前經降旨允江浙所請於乾隆四十五年正月啟鑿南巡並諭令沿途毋得踵事增華致滋糜費第念蹕路所經江蘇地面較多水營行官等事皆不能不需用度前四次南巡俱曾賞給庫銀以資籌辦因諭令高晉將現辦南巡差務需用銀兩若干通盤核計據實具奏茲據高晉將上四次南巡報銷銀數及恩賞銀兩開單呈覽並稱此次差務除添建行官

三處餘俱撙節辦理較之上屆所費有減無增等語
該省辦理差務所用經費既有一定章程上屆乙酉
年曾經恩賞運庫銀三十萬兩以資籌辦此次著照
乙酉年之例於運庫恩賞銀三十萬兩為辦理南巡
差務之用即著伊齡阿照數撥給仍具摺奏聞該督
撫務須董率所屬妥協經理毋得絲毫科派閭閻致滋
擾累副朕觀民孚惠至意該部即遵諭行

乾隆四十三年十二月初一日

上諭內閣曰前經降旨允江浙所請於乾隆四十五年正月啟鑒南巡因江蘇辦理差務不無經費已有旨令伊齡阿於運庫內賞給銀三十萬兩以為南巡差務之用矣第念浙江水營行宮等事雖少於江蘇地面然一切差務亦資費用自宜一體加恩著於鹽項餘銀內賞給十萬兩以為浙省辦差之用該督撫務須董率所屬妥協經理毋得絲毫派累民間致滋紛擾以副朕孚惠於民至意該部即遵諭行

乾隆四十四年二月二十六日

上命軍機大臣傳諭河南巡撫陳輝祖等曰薩載奏南
巡隨從官兵執事人等應需馬匹俱於綠旗標營及
江寧京口駐防馬內撥應查江寧京口額馬祇四千
匹不敷添換上屆經督臣尹繼善奏准在豫省旗營
馬內酌撥來江協濟照江省買馬價值解還豫省在
案明歲應備馬匹請仍照依上屆撥協等語著傳諭
陳輝祖即照上屆之例在豫省旗營馬內酌撥六百

匹於本年十月內撥送江省交界地方薩載慎派妥員前往接收交代善為餵養以為來年南巡協濟之用仍於差竣後照該省馬價還豫以便買補歸額該督撫等務宜妥為經理毋致從中滋弊將此傳諭陳輝祖并諭薩載嵩椿知之

乾隆四十四年八月十八日

上諭內閣曰前因江浙督撫等以兩省臣民望幸奏請巡閱河工海塘已降旨允於庚子春正月諏吉南巡

至所稱明歲為朕七旬萬壽欲就近申祝則斷乎不
可業經宣諭飭禁蓋朕本意原以庚子為朕七旬誕
辰辛丑即為

母九旬萬壽連歲疊逢大慶中外臚歡自可聽其抒誠
祝

今既不能遂朕初願朕復何心為已稱慶惟念士民想
望恩澤積有歲年因詔開鄉會恩科並輪免各省漕
糧一週以洽羣悃明年南巡回鑾後俟

郊禮成即起程幸避暑山莊駐蹕八月慶辰一切仍照
常年例行若在京受賀惟恐轉多根觸遂至山莊以
避之至於西藏班禪額爾德尼預請覲祝實屬吉祥
盛事是以允其前來即令於山莊瞻謁俾從其便朕
並非因其稱祝先期往就之也恐內外臣工尚未能
深喻朕意仍有以慶典為請者非唯不能博朕之悅
適以增朕之懷又豈臣子愛敬之道乎俟朕八月大
慶則當聽從諸臣稱祝此次必不允行又前屆朕六

旬萬壽時自古北口熱河兩處曾有點綴段落燈綵之類本屬朕所不取明年尤當嚴禁將此再行通諭知之

乾隆四十四年八月二十二日

上命軍機大臣傳諭總河總漕等曰昨因滇省戊戌兩運京銅限於五月以前全數抵通計入閘河以內正當漕艘重運之時諭令總漕總河預定章程使銅船與糧船分起相間過閘毋致守候稽時矣因思明歲

春間朕南巡江浙自直隸廠登舟以及回鑾俱由水程恐總河總漕以及沿途各督撫徂於舊例預將河道肅清令船隻預於支河汊港迴避以待御舟經過始准放行殊可不必朕巡幸所至原以省方問俗一切均須有便於民不但銅船限緊糧艘亦不宜遲斷不可令其迴避守候致稽程限即估舶民船亦不必令其遠避凡御舫所經舟楫往來聽從其便但須於經過時令各船貼岸一邊順排停泊過後即可放行

總不可因南巡蹕除河道無論閘內閘外均若無其事者然方為妥善著傳諭總河總漕及沿途各督撫深體朕意妥為辦理

乾隆四十四年十月初一日

上諭內閣曰朕明春巡幸江浙所有供宿頻次皆出自帑項絲毫不以累民第扈從官兵以及外省接駕人等輻輳雲集經過地方米糧價值恐一時或致騰踊著照從前之例於江浙二省冬兌漕糟內各截留十

萬石在水陸駐蹕地方分餵平糶卽令漕運總督及各該督撫妥協辦理該部卽遵諭行

同日

上諭內閣曰朕明春巡幸江浙於正月十二日啟鑾所有一切事宜著各該衙門照例預備

乾隆四十四年十月二十一日

上命軍機大臣傳諭山東各省將軍等曰朕來年臨幸江浙正月十二日卽行啟鑾朕所經由之山東江南

浙江各省將軍副都統城守尉等內未免有今歲年
班應來陛見者着將此傳諭經由諸處之將軍副都
統城守尉等其內若有今歲年班應來陛見者今歲
著俱不必前來俟來歲年底再來

乾隆四十四年十一月十八日

上命軍機大臣傳諭兩江總督薩載等曰明春南巡江
浙該督撫等自皆念切迎鑒越竟遠出但各省俱有
應辦事宜遠迎轉恐貽悞亦不必以此為敬且入疆

在即自可每日扈行常承指誨更不在早見數日薩
載楊魁閔鶚元止須於離江南境一站之山東地方
接駕三寶王亶望止須於蘇州接駕均毋庸遠迎將
此各傳諭知之

乾隆四十五年二月初五日

上命軍機大臣傳諭兩江總督薩載等曰各處行宮名
勝於駕未到之前不許地方官及各工員長隨與內
廷太監說話凡有陳設應俟派出查點之員到後查

交次日仍令伊等點還如平山堂等處商辦工程陳設亦不許商人與內廷太監說話亦俟派出之員到後查點從前太監張鳳認識商人皆由於此應以為鑒

同日

上命軍機大臣傳諭兩淮鹽政伊齡阿等曰朕清蹕時巡省方問俗供頓盡由公帑昨伊齡阿奏兩淮商人請捐銀一百萬兩以効惓忱在辦差經費原無需此

等捐輸第衆商情詞牝懇且昨已蠲免伊等應完銀一百二十萬兩又緩徵銀二十萬餘兩其踴躍樂輸之悃自必倍殷却之轉阻其誠意此項銀兩即留為此次各省辦公之用著交伊齡阿於此項銀內給還直隸公捐養廉銀五萬兩山東公捐養廉銀十三萬八千五百餘兩江南公捐養廉銀十二萬三千七百餘兩又前賞江南辦差銀三十萬兩亦著於此項內歸還原款又直隸正定隆興寺廟工告竣明春朕當

親蒞開光又山西五臺自乾隆二十六年巡幸後迄
今已閱二十年亦應於明春前往拈香其直隸山西
境內蹕路所經有應行修葺舊有行宮四處此外總
用行營斷不許再行添建並著於此項捐銀賞給直
隸銀三萬兩山西銀五萬兩以資修葺之費毋庸再
行捐廉辦理其餘銀三十萬餘兩仍即交存兩淮運
庫以備將來辦公之用

乾隆四十五年二月十四日

上諭內閣曰朕鑒輅時巡乘春行慶而清理庶獄矜恤
尤深用沛德音式敷愷澤所有江蘇安徽浙江三省
恩詔後軍流以下人犯俱著加恩各予減等發落用
昭肆眚施恩至意

乾隆四十五年三月初八日

上諭內閣曰朕清蹕時巡臨蒞江浙原因屢念河工海
塘親臨閱視兼以省方問俗順時行慶非為遊觀計
也前屢經降旨所有經過地方止須掃除蹕路一切

供頓毋庸踵事增華今浙省仍有添建屋宇點綴燈綵之事兼多華縟未免徒滋繁費朕心實所不取三寶王亶望均著傳旨申飭嗣後如再有似此過費者朕必加以嚴譴不能寬貸也

乾隆四十五年三月十四日

上諭內閣曰朕自三十年南巡以後迄今十有五年東南士俗民風易趨華靡每勗督撫大吏諄諄化導務期返樸還淳以臻郅治而江南之陶庄清口浙江之

海寧塘工其修舉尤關民瘼因先兩省督撫籲請於
今春再舉時巡之典乃自啟蹕以來所過在直隸江
南一切行宮供頓不過就舊有規模畧加修葺辦理
尚為妥協而從事浮華山東已開其端至浙江為尤
甚朕心深所不取現在陶庄及海塘各工經朕親臨
指示所有應行修理工程特命頒發帑金交該督撫
等悉心妥辦將來工程完竣後朕自當再來親蒞閱
視恐後任督撫見此次所辦差務已多粉飾未免踵

事增華從而加甚勢將伊於何底朕臨御四十五年
無日不厯念民依乃省方問俗而督撫大吏不能善
體朕心朕亦將引以為愧著再通諭各督撫以後務
宜黜奢崇儉於地方諸大政實心經理毋得徒事繁
華致滋浮費以稱朕惠愛東南黎庶之至意

乾隆四十五年三月十九日

上命軍機大臣傳諭安徽巡撫閔鶚元曰安徽巡撫閔
鶚元前於入江南境時接駕召見已面奉訓諭令其

回任辦事今聞其復欲前來江寧安省路途較遠往返需時况豫省黃河南經合龍該處為黃水下游一切堤堰宣洩並涸出地畝催耕補種無令失時應行籌辦之事正多閔鶚元若復出境遠迎轉於公務無益即傳諭於何處接此旨即速行回任

乾隆四十五年三月二十一日

上諭內閣曰前以庚子年為朕七旬萬壽恐內外臣工欲申祝嘏屢經宣諭飭禁此次南巡回鑾後一俟

北郊禮成即起程幸避暑山莊各督撫等皆不必前來稱
祝更恐外省督撫不能仰體朕懷聞因七旬萬壽有
取九九之義購備貢器誇多鬬靡甚至力有不逮而
隨衆效尤勉為充數尤屬不必各省督撫身任封疆
惟當大法小廉奉公勤職副朕委任本不當以進奉
見長著再傳諭各督撫今年八月慶辰一切仍照常
例若借七旬萬壽為名多事繁文以申媚茲之悃不
但為朕所不取且現經降旨令奏事處屆期遇有多

進貢物者一概不准接收諸臣其善體朕意毋得藉詞請覲致增繁費轉滋擾瀆將此通諭各督撫知之

乾隆四十五年四月二十四日

上諭內閣曰朕此次巡幸江浙踴途經過直隸山東地方其長蘆商人業經加恩緩徵課項所有山東商人並著加恩將乾隆四十五年應徵引票鹽課銀十八萬餘兩自本年奏銷後起限分作六年帶徵以示優恤該部即遵諭行

乾隆四十五年十一月二十五日

上諭內閣曰本年南巡接駕廢員經吏兵二部查明情節較輕者帶領引見除加恩錄用外其賞給職銜者業經朕親加甄別不得再准捐復至慶祝萬壽賞給職銜各員及此外緣事降革人員內如有在部呈請捐復者該部核明情節無論應准應駁俱著具奏請旨准捐人員並著該部帶領引見候朕欽定

欽定南巡盛典卷二十九